

遂

初

堂

文

集

遂初堂文集

吳江漣 未次耕著

卷之一

賦 頌

述征賦

懷舊賦

御試璿璣玉衡賦

金鏡賦

平蜀賦

平滇賦

瀛臺賦

秋夜讀書賦

葵賦

傷逝賦

九華山賦

端溪硯石賦

平山堂賦

滄浪亭賦

福泉頌

卷之二

論

畫卦不本圖書論

四象非五行論

九六七八論上

九六七八論下

參天兩地論

掛樸論

易圖論

九圖十書論上

九圖十書論下

卷之三

論

卦德論

卦位論

卦變論

卦氣論

納甲納音論

聲音元本論上

聲音元本論下

南北音論

古今音論

全分音論

反切音論

卷之四

牒表疏策問

上吏部牒

進孝經行義表

進通鑑講義表

歲終循例題明表

纂修皇輿表書成頒

賜廷臣謝表

永年曆進呈

恩賚銀幣謝表

請廣秘府書籍以光文治疏

請舉詞臣舊職以盡官守疏

遵諭陳言疏

策問三道

卷之五

議書

修明史議

樂章議

廣南藩兵議

吳江水利議一

吳江水利議二

與某總裁書

與某學士書

與某都憲書

與徐宮贊論唐十八學士書

與衛爾錫前輩書

與張素存學士書

與李允公書

與徐虹亭書

再與徐虹亭書

與梅定九書

與人書一

與人書二

與人書三

卷之六

序

重刻漢紀序

日知錄序

寇事編年序

殉國彙編序

曉菴遺書序

格軒遺書序

尚書講義序

文選淪注序

明文英華序

五朝詩選序

重刻李忠定公集序

葉少保文集序

張畱孺侍御疏草序

交山平寇本末序

余子迂草序

唐鑄萬潛書序

卓行錄序

增定史韻序

卷之七

序

重刻古本廣韻序

松陵文獻序

烏青文獻序

廣東新語序

雁蕩山志序

丹霞山志序

五嶽遊草序

徐霞客遊記序

鴻爪集自序

柳邊紀畧序

使粵日記序

鍼灸集要序

方程論序

宣城遊學記序

黃氏族譜序

陳氏族譜序



長樂陳氏詩系序

書畫彙考序

昭陵石蹟考序

仲氏印譜序

圃田印譜序

詞韻印証序

姑妄言序

卷之八

序

毛氏家刻序

許時菴制義序

吳楞香制義序

摘藻堂集序

陸冠周詩集序

南州草堂集序

臧岱青詩集序

胡漁山詩集序

竹笑菴遺詩序

草閣集序

町廬集序

菊溪詩草序

梅花草堂詩序

潘飲人詩序

潘寄嵐詩序

密遊集序

託素齋集序

楊東子詩序

李天生詩集序

朱竹垞文集序

旣耕堂詩序

宗兄望祖詩序

竹莊漫藁序

黃楊集序

樸學齋藁序

雪浪齋詩序

錢宛朱詩序

胥母山人詩序

露香閣十九秋詩序 鴛湖倡和詩序

卷之九

序

送湯潛菴先生巡撫江南序

送汪舟次檢討奉使琉球序

送田綸霞水部督學江南序

送勞書升前輩叅藩贛州序

送周求卓知榮陽序 送鈕玉樵知項城序

送趙天羽權關邦江序

送許時菴督學還朝序

贈吳子班序

贈馬天遊序

贈余冲子序

卷之十

序

顧亭林先生六十壽序

戴耘野先生六十壽序

五老同壽序

沈介軒八十壽序

盧景韓先生五十壽序

謝丹楓先生七十壽序

從兄文心六十壽序

戚元公八十壽序

徐侯齋先生七十壽序

錢飲光八十壽序

沈兼人六十壽序

尤悔菴八十壽序

宗兄木厓八十壽序

宗叔雲從壽序

宗兄話儀壽序

宗兄更菴七十壽序

王仲干壽序

龐雪崖壽序

王太夫人七十壽序

仲姊陳孺人六十壽序

卷之十一

雜著

書纂修五朝史傳後

書汪水雲集後

書史西村集後

書金石文字記後

書杜詩錢箋後

雜辨一

雜辨二

彭大彭早住辨

重刻致身錄辨

從亡客問

卷之十二

碑銘記

重建徐文靖公祠碑銘

鳳臺書院碑銘

重建狄梁公祠記

重修彰德府學記

李延平先生祠堂記

徐侯齋先生祠堂記

建寧府鄉賢名宦祠記

新安義學記

杭城濬河記

義井記

望川亭記

縱棹園記

濤園記

卷之十三

記

遊羅浮山記

遊天台山記

遊鴈蕩山記

卷之十四

記

遊南鴈蕩記

遊玉甌峰記

遊仙巖記

遊仙居山記

遊西洞庭山記

卷之十五

記

遊鼓山記

遊黃山記

遊廬山記

卷之十六

記

遊南岳記

遊悟溪記

遊三巖記

遊金牛山記



遊中岳記

遊林慮山記

卷之十七

記

水竹塢會葬記

許少保江右戰功記

殷公武略記

卷之十八

傳 行述

李工部修菴傳

尤侍講良齋傳

戴南枝傳

施紹周傳

費孝子傳

唐烈婦傳

二烈婦傳

顧節婦傳

顧節母傳

李節母傳

董節母傳

屠貞婦傳

先考贈徵仕郎仲和府君行述

先妣封太孺人吳氏行述

亡室封孺人申氏行述

卷之十九

墓誌銘

中大夫國子監祭酒吳君墓誌銘

翰林院侍讀喬君墓誌銘

太原知府周君墓誌銘

池州府學教授顧君墓誌銘

鴻臚寺卿劉君墓誌銘

中憲大夫韶州知府陳君墓誌銘

高州府通判汪君墓誌銘

李寧侯墓誌銘  
鈕芥菴墓誌銘

孫襄臣墓誌銘  
丁墨霞墓誌銘

沈節婦墓誌銘  
余節婦墓誌銘

亡妻王氏孺人壙誌銘

卷之二十

墓表 贊 銘 祭文

歷陽王先生墓表 臨海馮氏先墓表

費隱君墓表 李孝貞女贊

朱節婦贊 從姊淑孝贊

像贊二十二首 硯銘三十首

祭葉文敏公文 祭吳東里先生文

祭汪悔齋文 祭江怡昭文

祭阮巖文 祭范太夫人文

祭表姊周孺人文

遂初堂文集卷之一

述征賦

敦非之歲兮日月向除僕大整駕兮吾將北徂橫大江  
而徑逝兮指淮浦以爲期旌搖搖其將邁兮心愴怳而  
踟躇哀吾生之多艱兮遭喪亂而播遷羌匝年而三徙  
兮曾不得乎少延伊吾祖之卜宅兮在笠澤之下渚臨  
具區而瞰包山兮雙溪沄沄而承宇信仁智之所樂兮  
爰族居而里處夫何遘命之不造兮倏星離而雲散悼  
骨肉之乖隔兮嗟始合而終判鴒飛鳴索其偶兮鴈躑  
躑而求其曹雖一枝之安棲兮曾莫返乎故巢羗飄風

之被離兮增翩逝而漂搖余束髮而誦書兮懷壯思之  
慷慨雖端居於一室兮乃遊精乎四海慕正則之遠遊  
兮鞭風霆而爲衛越九野而度八紘兮曾不足以芥蒂  
維高堂之晨昏兮與季弟之孱雅願橫逝而無繇兮卷  
此志而莫遂伊吾親之就衰兮宜藥物之所須乃扁舟  
而涉湖兮指西山而移居經硯石之巖巖兮傍蓮峰之  
峩峩采三秀之華芝兮索千葉之蓮花擣菊滋而掇桂  
英兮潔以爲晨羞蹈伯鸞之清塵兮求翁子之所廬廷  
龐公於鹿門兮拜德操於龍岡欽喆人之休風兮結衡  
茅而相望論道德之玄素兮彈鳴琴而賦詩聊逍遙以

娛樂兮遂彌年而滯茲何日月之不居兮歲冉冉而云  
邁忽長想以覺寤兮恐盛年之不再升高丘而四望兮  
馳遙睇於八荒激長嘯之清風兮意慷慨而飛揚覽九  
州之博大兮觀河山之參差陘南州之迫隄兮陋吳會  
之喧卑盼清淮之湯湯兮瞰大河之洋洋韓侯戒而先  
路兮八公紛其竝迎壯褻革之遠言兮偉懸弧之遠志  
恐志氣之頽惰兮將遠逝以自厲紛總總其六合兮嗟  
孰者之爲樂邦旣漂泊而寓居兮又何懷乎故鄉夫侷  
儻而高引兮固通人之所與行瑰傑而不羣兮又衆人  
之所駭人情同於懷土兮豈余衷之獨異審宴安之不

可懷兮故超遙而高邁昔馬遷之卓犖兮二十而浮江  
淮延陵子之閎覽兮亦歷聘而觀諸華梁鴻長嘯而入  
吳兮相如釋官而遊梁或南產而北學兮或西人而宅  
東彼賢達之遠覽兮豈庸俗之能量黃鶴一舉凌天池  
兮再舉返其故丘從鷓鴣之所安兮固將老於藩籬



懷舊賦

癸卯之秋余以事入都路經淮陰得謁王起田先生  
傾蓋之雅過蒙器重周旋欵洽恩若干生歸自京師  
淹留旬日遂申婚姻之約誓以百世之好雖元禮之  
於文舉伯喈之於仲宣未是有也已酉仲夏余自吳  
來省起居未旬月而先生以疾捐館嗟乎長老云亡  
哲人萎謝顧瞻筵几俯仰傷懷乃音容未遠星火云  
變秋夜獨坐朗月照帷涼蟬哀號怛焉增感昔子期  
思舊之賦傷故知也安仁懷舊之篇哭所親也余於  
夫子思則知己分則密親感往悼今撫時傷物情不

能已遂援筆而爲之賦其辭曰

夫何羈人之愁戚兮心繚悵而不舒思泛覽以放意兮  
步逍遙於庭除聽時禽之鳴聲兮聊吟嘯以自娛兆開  
秋之靜夜兮微涼降而襲膚殷大火之宵流兮林條苑  
其始踈朗月皎以麗天兮蟋蟀鳴而愁余維節物之不  
居兮夏與秋其代謝伊哲人之委運兮形與神其俱化  
節旣往而復來兮神超遙之焉舍悼今往而悵罔兮想  
昔存而悲咤歲闕之仲秋兮余攬轡乎上京爰涉江  
而濟淮兮經韓侯之故城聞仲回之清操兮欽彥芳之  
德聲遂停輪而進拜兮欣脫屣而相迎維時海鴈飛而

乍南兮秋氣爽以麗佳菊婀娜以含英兮桂紛披而吐  
華先生乃開南軒而坐客兮命羽觴而泛卮方初筵而  
歡洽兮披情素如舊知申欵曲於旣醉兮終握手而連  
而審征旆之不可留兮指還轅以爲期旣返役而稅駕  
兮遂淹留於浹旬愍王粲之流離兮傷陶侃之孤貧奇  
伯鸞之耿志兮嘉正平之能文指愛子而要之兮命結  
以爲弟昆情睠睠而靡終兮許愛女以爲婚講百世之  
嘉好兮結千里之壻姻伊人情之茭茭兮咸趨榮而厭  
悴孰煦濡於泉涸兮孰卵翼於巢碎卞和號夫荆璞兮  
伯樂泣夫騏驥無古人之朗鑒兮知奇遇之不再嗟小

子之薄劣兮遭時命之艱難既早歲而失怙兮又骨肉  
之凋殘痛本宗之零落兮傷門戶之孤單性愚戇以闇  
時兮又耿介而違物渺四海而無家兮曠人羣而寡合  
抱青雲之奇志兮欲橫厲而無梯願戢羽而澤毛兮無  
一枝之可棲何殊鄉之邂逅兮荷夫子之溪眷曾鴛蹇  
之陋姿兮比龍媒於赤汗餌黃雀於墜弦兮收枯桐於  
在爨銜淚恩而莫報兮每怵惕於申旦何大命之靡期  
兮嗟奄忽而遽變余仲夏而發吳兮爰來視夫起居欣  
神明之精朗兮慶顏色之敷愉承緒言於從容兮託雅  
志於江湖言我樂南土之清嘉兮并日夜而夢思惟婚

遠鈞深六曆辨其疎密登書雲之臺觀遺憲猶存披  
載籍之淵林頌辭蓋闕嘉其巧妙特與讚揚爰命在  
廷抽筆而賦謹獻賦曰

仰崇高于穹宇浩遼廓而無形惟三辰與七曜有懸象  
之著明咸浮空而宗動紛輪轉而莫停兩極建樞於南  
北萬象羅列於縱橫旣欹斜以旁紐亦出入之互經章  
亥無所施其算容成莫能測其情時維至人叅天兩地  
窮幽洞明覃精畢智握陰陽之樞機探造化之根蒂剖  
青萌及黃芽搜月窟與日竈見兩儀之互苞察四遊之  
相際作鴻寶以前民有璣衡之偉製惟璣也法天體之

規圓惟衡也。察衆曜之廻旋，璣匝布以利轉。衡橫設以鈞連，斗運中而不忒。極出地而微偏，鶉尾鶉首協其度。天廟天根肖其躔，黃道斜交於赤道。單環對峙乎雙環，宛積氣與含水。若璧合而珠聯，乃飾美珠乃刻文。玉德產精微，物華輝煜類鴻鈞。之在冶似衆輻之共轂，一綫經於地平。九行帶於天腹，旣懸璣而垂象，復執管以窺璣。驗晷景之長短，推寒暑之密移。園則九重其無爽，嶰谷累黍其無遺。烈風雷雨不愆其度，重陰昏晦不失其儀。在昔重華是觀，是察先天弗違。惟聖作哲，用舉正而履端以迎日，而送月。攝提孟陬於焉受紀，東作南訛於

焉應節惟斯器之神妙實剖析夫鴻濛迨踵事而增華  
乃作則於無窮或輪囷而刻木或璀璨而鑄銅或設輪  
而激水或動地而叩鍾削蓮花而傳箭斷觚稜以盤龍  
立偶人於機上錯銀丁於軸中咸本斯而祖述侔巧心  
於化工惟我

后之欽明嗣無疆之曆數爰極浚以研幾洵開物而成  
務道無廣而不苞理無幽而不覩握金鏡於泰階執乾  
符之鑿度齊軒轅之造曆軼太初之分部每省歲而察  
行用登臺而升庫曰面稽於天若嘉璣衡之盡神範造  
物而不過垂萬祀而長新命抽揚而作頌同發策於天

人慚張衡之博識愧陸倕之能文旣管闕而莫罄復蠡測而無因謹橐筆以獻賦效微忱於拱辰



金鏡賦

竄聰明而首出惟

天子之當陽則懸象以照臨被八表乎天光道無隱而  
不燭物無幽而不彰金鏡儼其在握協圖錄而開祥伊  
明鏡之可珍妙物華而無匹萃五金之精英收灑氣之  
清謐資爐炭於陰陽經百鍊而成質湛內景以含光肖  
萬形而不失周輪應規大闔象天銀華璀璨金薄迴旋  
卦兆森其環列蛟龍鬱乎相纏彩灑灑以吐月波淳淳  
而潤川至潔無瑕織塵不垢體木一無妙涵萬有因萬  
類爲妍媸初何心於臧否惟至寂爲能通惟至虛爲能

受照膽懸於秦殿寫形設於魏宮洛京珍其鑿鑑鄴臺飾以盤龍匪瑰異之足侈良楷則之是崇既鑿前而慮後亦明目而達聰在唐開元千秋著節百僚獻琛寶鑑在列嶽嶽賢相時維九齡因事納忠隨物著情念周書之成訓鑒於民無鑿於水思韓子之格言以鏡正形不若以道正己乃集往事披前圖範古式垂今模十條著錄金鏡名書備法戒於獻替效納約之區區玉几丹扆是型是式無競惟人不顯惟德惟臣盡規惟主容直故開元號爲治平而曲江之名不泐烝哉我

皇淵穆文明維睿作聖大猷是經仰觀俯察持規執衡

地不愛寶人不愛情燭銀出於山阿璣鏡浮於水滌波  
祇貢於望蟾沮渠獻其火齊金繩玉輪之奇四規三尺  
之製克物官庭匪珍匪異方將轉鴻鈞以爲爐範天地  
以爲圍覽墳籍之淵海究道德之指歸陳書於申鑒取  
士於鏡機既酌古以準今復覩著而知微探蹟鈞淡成  
務開物遠無不照邇無不察圖事惟幾官人則哲形端  
而影從源清而流潔

天子穆然無爲端拱於殿廊左圖右史前輝後光齊風  
乎卷領比隆於垂裳其斯爲  
帝王之大寶與天府而無疆

平蜀賦

皇帝御宇十有八年冬

命奮威將軍臣進寶勇略將軍臣良棟率師討蜀寇密授方略分道進攻十九年正月癸卯進寶克保寧僞將軍王屏藩窮蹙自盡擒吳之茂以下二十餘人前三日庚子良棟自龍安進克成都僞巡撫張文德降蜀地大定丁巳露布至京宣捷午門外在廷之臣咸以

皇上廟筭恢闕坐見萬里激厲將士建茲奇勲相與踴躍唱歎形之聲詩臣遭遇

殊恩載筆史館頌揚成功職不敢闕謹獻賦曰

遂初堂集卷之一

七

溯皇王於前烈偉捷伐之鴻謨奸無鉅而弗剪兇無遠而弗鋤靈發聲於豐隆星耀芒於威靈鯨吞舟而就斲蛇搏象而見屠法春生與秋殺有霜落而露濡必武功之遐暢乃文教之誕敷惟我

皇之聖仁廓天地以爲量王道履以平乎天門開其蕩蕩彼么麼之小醜敢盜兵而衝抗類射天以彎弓似逐日而投杖蛙處井以陸梁螳當車而傾強依嵐菁以爲巢憑崖谷以作障巖巖梁益實號金城國關蠶叢山開五丁劔閣梯空以懸度棧道循絙而上征天井盤旋而窈黑地網綿絡而縱橫水以虎牙赤甲爲咽喉陸以龍

門鹿頭爲門戶挺一戈以當關非萬騎之能取遭天光  
之分耀有草竊以偷處曾六合之一家敢走險以旅拒  
雄虺九首苞蘖三芽傳烽巴閬築壘褒斜驚百城於風  
鶴變一軍爲蟲沙初屯蜂而聚蟻旋鬪鼠而戰蝸思明  
殪於河陽少誠殲于淮表彼逆孽之遊魂若枯莖之待  
掃何醜類之睢盱尚橫距而肆爪倚嶂嶺之千重謂天  
險其可保

皇赫斯怒整我六師招搖爲戈參伐爲旗審制勝之在  
將料奪險之用奇拔虎臣於行間建高牙而授之曰汝  
進寶龜貅如雲東趨閩中毀其重門曰汝良棟突騎風

雨西走陰平抉其後戶分道交攻奇正相權或倚或角  
動於九天惟東軍之驍騰凌七盤而徑度奪朝天之巖  
險葭萌空而不戍分勁旅爲三行令異道而同赴摧堅  
陣于背城斬突豨而餘怒積甲齊乎錦屏投鞭斷乎江  
路迨禁旅之薄城斬門關而齊鴛兒渠焚于窮猿逆黨  
禽于脫兔蓋纍纍籍籍鈴甲而縛者不知其數西師卷  
旆以橫邁据密樹之重關出間道以擣虛儼虺襲而林  
攀爭白水之阨塞破鐵門之孱顏忽浮馬而渡江張赤  
幟于菁山朝耀兵乎江油夕嚴陣乎絲竹訝天兵之飛  
來俄攻心而潰腹開錦城之戢戢豎降帆之一幅收奇

功于浹辰若風雷之迅速捷書並奏飛檄交馳鋒不再  
淬矢不再披剗勁寇若振槁舉名都如拾遺  
天子乃升紫宸之殿讀露布於彤輝千官集乎

闕下望

天顏之怡怡莫不鼓舞讚頌曰盛哉乎武功振古未覩  
茲也惟此劔南代有反側慙山燒棧便同絕域若漢室  
之討公孫晉氏之斬李特宋主之擒譙縱唐宗之誅劉  
關皆用堅攻瑕以順討逆風行電掃罪人斯得然猶水  
陸夾攻首尾並擊傷損將士窮竭兵力彌歲淹時僅而  
後克未有不頓一兵不折一戟駭若發機震若霹靂旬



月之閒廓清西極如今日者也

天子將將大將將兵旣得龍驤復有營平師以和而後  
克功惟斷而乃成規萬里若指掌故無戰而有征夫蜀  
國者滇黔之維首也蜀平則破竹無前建瓴直走蒙詔  
亡魂貴筑不守將遂定邛夔略犍爲兼冉駝收沈黎簡  
巴渝之勁卒與彭濮之銳師浮舟牂牁飲馬瀘溪峨嵋  
爲鐔點蒼作鏑罍杲葉榆同掩蒙樂伐銅鼓之碎訇驅  
金馬之騰趨血鑿齒以毀鋒膏猥偷以染鏹然後前歌  
後舞班師而還受成

廟社薦功

皇天包干戈以虎皮却走馬以糞田沛曠蕩之恩一復除之

詔與萬姓相勞苦哀疲氓之無告撫摩癡瘡長養凋耗  
勸耕課桑與廉舉孝蒸斯人於太和羣詠仁而蹈道基  
隆平於萬年襲三五之休號豈不盛哉遂作頌曰夫錫  
智勇爲

君王兮神武不殺誅猖狂兮運籌決策自

廟堂兮任屬賢將齊鷹揚兮天戈一揮除機槍兮遂清  
大憝克鬼方兮長御遠駕包八荒兮刊山表柱垂無疆  
兮

平滇賦

粵稽皇王數典考墳紹業承統守文之君或英明而沈  
毅或恭儉而寬仁休風駿烈厥亦有聞若夫彌綸造化  
整頓區宇經世以文戡亂以武除凶殘若風霆沛德澤  
如膏雨巍乎迓哉首出之聖書契以來曾不數覩惟  
國家誕膺休命

列聖重光宅中國大臨馭萬方

皇上克聖亶聰嗣纘曆服阜成兆民平章百族威暢德  
敷義涵仁育煦之以春陽潤之以霖霖方銷兵以鑄鋤  
希還醇而反樸屬者五緯遺氛三辰餘沴國丁小厄天

亡醜類乃有三藩之事以勤我

聖帝惟三藩者滇南爲魁次廣與閩一苞三葉駢榦連  
根實

先朝之宿將亦勝國之逋臣諒豺聲而鷹眼非羈繼之  
能馴

先皇帝大度軼乎漢高淡仁邁乎宋祖念其搏擊之勞  
鼻以帷蓋之所高牙大纛作藩南土蓋將以威蠻制獠  
壯干城而扞疆圉何圖爵極而亢寵過斯驕擅士馬之  
維富與土地之殷饒殺生操於幕府除拜擬於  
天朝聚宵小爲淵藪流金錢如波潮無懸癰而不潰有

厝火其必燒

皇上明燭未形智周無象金鏡在懸太阿在掌與其滋  
蔓而難圖不若消萌於方長與其後事而芟鋤無寧先  
時而滌蕩爾乃發

睿策啓

神謨因乞休之陳請下撤還之

詔書俾移屯於遼海卽樂土而安居將保全乎勳舊匪  
弓藏之可虞蠢爾滇渠敢行倡逆忘奕葉之寵榮背  
累朝之恩澤矜百戰之餘勇謂人寰其無敵規豕突與  
鯨奔遂白頭而作賊裂背一呼其從如雲鞠弓毒弩十

萬爲羣旣席卷夫湘江復虎踞乎夔門將北向而爭利  
勢滔天與燎原閩廣之兇以次干紀毒虺雌雄長蛇首  
尾其餘反者蝟毛而起西綿隴坻東絡海澨鄜延之郊  
荆襄之鄙震聳者三方驛驛者萬里甚漢室之溷雄同  
唐家之安史彼敦峻與景全何兇鋒之能擬惟

皇神武不震不驚恭行天討赫赫明明發雲臺之鎧仗  
整岐陽之旆旌丈人長子維城磐石之宗以爲將帥中  
黃虎賁射聲伏飛之士列乎屯營於是親畫成規密授  
方略旣攻心而伐謀亦擣虛而批郤堂堂聲罪之辭戔  
戔賞功之爵踞鞍而猛士色飛騰檄而凶徒膽落

天子之兵無戰

帝王之師萬全不逐一壁之利不陷一城之堅其守也  
靜於九地其攻也動於九天是使劇賊挫鋒梟雄失氣  
矢如雨而不得射戟如林而不得刺麕騰躍而技窮虎  
咆哮而力弊賊衆有魚爛之形官軍成破竹之勢遂乃  
平乘巴陵橫掩洞庭澧浦之舡艍尖水衝峰之草木皆  
兵逆臣賊子亡魂喪精血未膏於王斧身已殛乎天刑  
亦越閩關天兵飛度士女謳歌壺漿塞路叛臣面縛而  
來歸逋寇倉皇而失據蜃咽氣而消亡鯨跳波而僵仆  
彼粵孽之凶狡信梟獍其何殊幽厥父以稱亂牙擇肉

而恣睢天戈臨而糜爛何螳臂之當車嗟華而其已晚  
有延頸而就誅若乃狐鳴鷓鴣之羣鹿鋌狼奔之隊尤  
來大槍之盜魁延岑彭寵之叛帥首鼠前却乍叛乍臣  
者以千百輩莫不脫距摧牙沙崩瓦壞楛戶疏屬之山  
傳首桃林之塞於是陰平夜走劍閣朝通索橋度馬藤  
峽懸弓黔蜀之地悉定水陸之師會攻徑盤江而擣角  
蹂蒼山而抉剄高壘馮城長圍四築不頓一弦不亡一  
鏃嗟劉稹之跋扈與元濟之窮蹙曾飛走其無路空椎  
心而慟哭竟駢首以入函無遺種於凶族於是八方奠  
定六合無塵梯航窮乎日窟鞬譯盡乎天垠邊陲無鈴



柝之警函夏皆耕桑之民櫜弓脫劍一軌同文原夫三  
藩之設歷紀於茲尾大不掉實繁披枝國勢爲之衝決  
民生爲之瘡痍而今而後快然毒去霍然病衰烟消霧  
劍天清日輝非

大聖人之威德何以及斯惟幾也爲能周天下之慮惟  
斷也爲能成天下之務撤藩之議偉矣狃於苟安搖於  
浮言則莫能以果決難作而張皇釁成而姑息則莫能  
以速滅藩鎮之禍未有所底也

皇上以一人之智勇爲海內除大殘以八年之憂勤爲  
萬世貽永安雖唐帝之戰丹水軒皇之克阪泉夏后格

有苗於兩階殷宗伐鬼方於三年絜功比德未知其後  
先猶且謝鴻名而不居推大美而不有彌謙冲以兢惕  
期保泰于永久肅乎欹器之或傾凜乎馬索之將朽哀  
烝人之疲勞念三星之在留遂乃發

德音沛

恩綸捐逋賦予貧民赦獄囚廣大仁優卹將士大資臣  
鄰罷一切權宜之制與天下爲更新大圭禮

天特牲祭

廟望祀山川潔將標燦極尊養於

兩宮增推崇之顯號馳展省於

園陵薦成功以昭告然後申明象魏釐飭官常百度具  
舉四維高張天人協應儲休降祥甘露零庭朱草豐唐  
奏韶濩之樂舞夔山龍之文章故道與天地同流而德  
與黃農齊光也日出作兮日入息道平平兮無反側旋  
乾坤兮

帝之則賡卿雲兮臣之職歌九功兮頌七德播永永兮  
長無極

瀛臺賦有序

臣聞闐風瑤圃稱天帝之下都弱水方壺號仙人之別館自昔帝王萬機清暇咸有離宮行殿用備巡遊在漢則甘泉長樂載在黃圖若唐則興慶九成標於綠牒莫不綿山絡谷掩隰吞原靡麗極夫人工游幸妨乎機務然猶淵雲載筆燕許攜辭賦頌斐然垂之金石

皇清定鼎燕京於宮城之旁西苑之內有瀛臺一區引泉作沼疊石爲山華而不靡樸而不陋土木無雕文之巧時巡無供頓之勞聽政不異明光齋居有同宣

室制度規模遠軼前代自非形諸文翰何以昭示來

茲臣竊考前明諸臣紀遊西苑詩篇頗為詳明叅諸

見聞髣髴得其梗槩謹述瀛臺賦一篇頌揚不朽其

辭曰

惟皇都之壯麗宅九野之奧區山迴環以羣拱水翔舞

而畢趨法宮規夫紫極正殿象乎天樞羅千門與萬戶

鞏萬年之鴻圖彤廷穆以嚴凝丹禁紛其縈紆儼天居

與神闕豈名言之可摹爾乃苞通川以為池掩廣藪以

作囿儲天淵於掖垣兼陸海之繁富錦嶂疊兮如霞瑞

林錯兮如繡盡體勢之恢闔極雲景之明秀爰有層臺

峙乎其中璇題輝映璧房瓊瓏遠而望之鬱何葱葱若  
金銀樓闕觀海上之方蓬又若清都紫微從化人而遊  
天宮繚垣周遭輦路相屬冠山爲堂緣溪架屋繡拱攢  
雲華榱刻玉晶熒璀璨不可畱矚碧瓦爛其若流金莖  
聳以高矗超塵氛之北垞收灝氣之清淑泱泱澄湖玉  
泉所停萬頃沉浸百尺清泠涵城闕以霞淨寫遙空而  
練明象蒙汜之遠漲若河漢之斜橫石梁蔚其嶙峋跨  
素波而雙堰儼齧戴與虹垂乍翠舒而雲卷秘殿穹窿  
以規園雕欄彩錯以矩轉瓊臺萃律於中流廣寒輦飛  
於絕巘繁萬歲之仙山帶百果之禁苑鎖鱗屋於層瀾

藏龍舟於修堰於是羅生栝桂雜植蘭茗女桑垂蔭河  
柳抽條島名瓊華園號芭蕉盛夏含秀經冬不凋緣陂  
之傍彌望葭菼覆水蕭森得風掩冉菰蒲陸縈以冒崖  
芙蓉婀娜而承檻爛雲錦之無涯與清波而澹淡珍禽  
異族游泳其間王雉白鶴嚶嚶關關應龍鼓翼於泆濟  
鯨魚曝鬣於灣環浴日月之晃朗翻珠貝之璘璫窮神  
臯之幽勝苞天府之珍奇耳目爲之昭曠心神爲之愉  
恬

天子乃以徂暑之節炎蒸之時乘鸞輅蔭華芝出椒殿  
越蘭墀就行宮以清暑恒偃息而在茲卽苑爲宮因臺

作殿八風清涼一水凝澱居高明以散懷宅爽塏而流  
盼省章奏以忘疲剗機務而靡倦彈有虞之五弦奏葛  
天之清歌南薰生於欄楯慶雲起於巖阿泛蘭舟而容  
與臨華渚而婆娑憇三亭之幽寂陟九島之嵯峩草木  
承恩以衍地魚龍銜澤以躍波暢  
皇心而發

睿藻惟休豫之孔多然而臺不重累池不更鑿石砌無  
文采椽不斷因基之舊取制之樸惜露臺於百年重鹿  
囿之改作苑墻之外悉施與民櫺宇櫛比原田勻勻芻  
蕘接於靈囿蹄輪錯於天津人咏康衢之化家頌騶虞



之仁豈與夫規南山以爲苑吞雲夢以作澤掩地之財  
勞民之力徒侈游觀不存儉德者可同年而語哉頌曰  
崇崇靈臺宅天中兮上法太微環紫宮兮吾

皇蒞止千官從兮匪遊匪豫勤天工兮洪流泱泱天澤  
濃兮禽魚翔舞帝力闕兮調燮四氣宣八風兮於胥萬  
年樂無窮兮

秋夜讀書賦

惟四序之平分兮竊獨嘉此素秋天昭昭而遙曠兮野  
肅肅而清幽去驕陽之恢台兮就微涼之悠柔欣商風  
之乍披兮快溽雨之初收木葉下於林臯兮白露被於  
林丘候雁翩其南翔兮大火渺以西流若乃秋宵始長  
萬象嚴淨玉衡左迴銀漢斜亘月白如綃天澄似鏡草  
蟲微吟鳴蟬相應發思古之幽情引纘言之逸興歲冉  
冉而易邁時亟亟而當競於是啓北戶開東軒屏塵坐  
離囂煩惟卷軸之岑寂久與我而相存及遙夜之無營  
發陳篋而討論浩瀨經籍紛紜圖史探之莫窮其源尋

之不見其委憑短綆之浚沉汲重淵之渺瀰義無與而  
不求緒無蹟而不理縱橫百氏貫穿古今收衆珍於滄  
海攬羣材於鄧林蕪無誇於游目道唯取乎會心言無  
言而逾貴味無味而可歆爾乃披風簾展月幔拂繩牀  
移竹案分藜火之輝煌映璧曜之璀璨漱茗椀以餘清  
藝爐香而小斷漏沉沉以向曉鷄喔喔而將旦諒所好  
之在茲故窮年而忘倦於斯時也非無豪家戚里游閒  
公子拂袖蛾眉傳杯皓齒急管盪心繁絃暗耳彼貴遊  
之所耽何天樂之可擬亦有通人豪士舒情散懷吟風  
弄月歷榭登臺撫景流連對節徘徊良寄託之有在非

吾人之所儕伊眇末之自處甘守拙以抱愚無馳騫之  
長材聊竹素以自娛際文明之昌運幸託身於石渠窺  
羽陵之墜簡抽石室之秘書惜往哲之分陰愛韶光之  
三餘將優游以卒業謂世味其焉如

葵賦

攬羣芳於林圃伊茲葵之可嘉迎景風而振采應淑節  
而舒華結團圞之翠葉揚灼爍之丹葩爾其託蔭高甯  
結根廣囿裊露以榮滋泉而茂節裊裊以孤標枝亭亭  
而獨秀將翠竹而比直與黃花而方瘦當夫艷陽逞媚  
桃李爭妍亂紫如姹繁紅欲然茲特立如有讓闕奇姿  
而不宣似幽人之靜默比節士之貞堅迨於赤帝乘權  
祝融司職萬卉銷華千林掩色爾乃抽英玉砌之旁發  
耀金溝之側陵暑月而神王敵炎威而意得璀璨網緼  
颯沓繽紛含風漾彩映日流芬乍漸濡於膏雨旋覆露

於油雲旣堆霞而吐艷亦錯繡而垂文累月長榮經旬  
不謝紛披魯女之門照灼公休之舍共萱草而扶疎竝  
槁枝而低亞惟勁節與疎香獨留連於永夏若乃賦資  
純一秉德淑清朝光升而東向暮影落而西傾與太陽  
乎協德隨日馭而注情類忠良之眷主披赤心而自明  
浮雲不能隔其志蔓草不能沒其誠故比德於君子在  
百卉而爲英所以鮑莊讓智尼父興歎陸生感詠顏公  
作讚豈猶夫木槿丰茸辛夷爛熳疎麻可把芙蓉堪翫  
爭薄艷於林臯競浮榮於宵旦者哉重曰寧直節兮擷  
孤芳心所傾兮在太陽嘉靈根兮不能忘欲植之兮在

玉堂

卷之五

五

傷逝賦

吳子漢槎少有異才舉於鄉中蜚語謫戍北荒中朝  
公卿多憐之者居二十餘年更數赦得贖還母子弟  
兄相聚歡若更生無何遽得病病一歲竟死吳子與  
余中表兄弟相善也吳子尤數稱余賦謂不落齊梁  
風格今已矣悲慟之餘爲作賦一篇置諸靈牀亦孫  
楚驢鳴之意云爾

悲夫皇天之至仁兮煦萬彙而丰容  
羗獨阨此文士兮萃荼苦於厥躬  
數有伸而皆屈兮途無通而不窮  
舉人謀以拯救兮神俯背而不從  
伊人林之閭淳兮君獨有



此嫫質蘊藻思之葩華兮振奇采而橫逸編珠貝之璀璨兮又綴之以明璫襲雲錦其猶未麗兮抽天孫之七襄世靡才而不索兮宐振衣而高步何斯人之蔚炳兮反顛躋而失路嗟失路其亦何傷兮又被之以謗聲糝玉石而一槩兮非剖心之可明謂椒無馨兮謂蘭不芳龍淵不利兮鑿鑑無光南威美而先行兮謠詠詈之以銜駢駢躡景而馳兮謂詭銜而泛駕天門高其無垠兮震雷電之馮馮指龍荒而長流兮涉寒門之凌兢白草浩浩兮黃雲晝昏增冰積雪兮無夏無春虎豹嗥以東西兮魑魅嘯而相存塊獨處此絕域兮閔溘死而無

聞歲復歲其寢久兮忽天迴而地轉及

皇仁之沾覆兮馳明駝而遄返脫羊腸之險難兮就莊  
楮之坦坦木向晚而欲華兮冰始泮而將暖夫何痼疾  
之驟嬰兮遂沈滯而幽憂鬼伯相促一何急兮大命曾  
不得以少畱謂人之善忘兮何天其亦汝軋也謂時之  
不逢兮何算其亦汝奪也謂天之不慈兮何初困而卒  
脫之謂造物者之垂憐兮何既萌而又伐之乃知才士  
之處世兮與愁苦乎相膠烏彩翠而蒙繳兮木芬香而  
見燒仲翔竄沒兮顯士容死文考短折兮終童稚齒君  
既生還而考終兮踰五十非天年較古人其已多兮又

何恨乎重泉亂曰大鈞搏物初無情兮  
苑枯壽夭隨物所丁兮傅翼去角理固  
然兮多華早落誰執其愆兮至人渾渾  
無淄磷兮含章守素與道合真兮

九華山賦

考南條之山勢總歸宿於江東繁池陽與姑孰咸卽山而爲邦巖攢羅以競秀嶺錯峙以爭雄究孤標而傑出惟九華之層峰望百里而可見倒翠影於江中試捫蘿以幽討信累月其難窮爾其分支黃山衍脉鄣郡憑積高以託基宅環中而爲鎮孕斗分之清英發離暉之朗潤神奔騰以效竒天儼悅以披蘊一氣所搏鬱何紛葩千林吐穎萬卉抽芽城墉周遭屏帳交加望之無垠卽之無涯九十九峰載在圖記言其大凡未及瑣細靈府奧區帝之所秘遊人至斯九陰一霽徒想像而彷徨曾

未得其髣髴余邀貺於山靈假清朝而謁來招長風於  
天表掃信宿之昏霾露衆峰之娟妙若簾幕之乍開陟  
複磴之縈紆躋連岡之崔嵬旣幽探夫虎窟復高步乎  
天臺盡茲山之體勢故宏博而奇瓌爾其爲峰則有天  
柱雲門枕月拱辰獨秀聚玉列仙真人五老僂僂以擁  
杖二神昂藏而拖紳九子詵詵以齒讓七賢岳岳而來  
賓獅子蟠拏天馬天矯雲帶修織蛾斜縹緲螺髻浮青  
於林端玉屏滴翠於雲表蓮花千葉以舒新芙蓉聯房  
而呈巧其巖則有碧桃磊砢虎頭狎獐雙石秀出三斧  
削成觀音巉刻以斗絕寶陀層複而迴縈邃谷則盛夏

含雪透碧則重簷空明晏坐以神僧著蹟清隱以逸士  
標名其洞則有三遊九曲堆雲棲禪金光影現無極聲  
傳雲巖像乎堂庭古仙隱夫溪田大小魚龍靈竇潛通  
凝乳萬狀劔珮旌幢綠魚白鳥玉柱霜鐘編筏乘炬溪  
不可窮其石則有鬪雞靈龜臥牛伏虎風輪花牕金剛  
老姥加冠拱笏或仰或俯赤壁繡壁如錦如組其泉則  
有虎跑龍女碧玉金沙七布疑練三折如巴翠瀑飛流  
而激射纓絡交瀉以葩華甘露一酌以神清溫湯暫浴  
而病瘥若乃嶺號摩空尖名仙姑天臺高出於萬峰之  
表仙橋橫亘於絕壑之區溪有五龍黃石澗有垂雲葛

蒲池則嘉魚翠羽潭則濯纓弄珠或蒸雲而洩雨或涵  
空而切虛或削膚而露骨或含苞而吐瓣或雄傑以端  
挺或姚冶而紆徐或開朗以秀發或爾遠以清疎陰晴  
之態千變朝昏之景萬殊非詩筆所可肖豈畫工之能  
圖維此仙山爰生靈物奇禽羣翔異草叢茁石秀紫芝  
竹垂丹實松五釵而輪囷蒲九節以蒙密娑羅之樹駢  
生步搖之花對出鉢蘂清芬以覆雲仙葢丰茸而礙日  
羚羊倒挂碧雞雙飛提壺勸酒惜春催歸念佛之音清  
婉擣藥之聲希微班魚游泳乎潭心蒼鹿騰驥乎巖扉  
非塵世之所有與仙靈乎相依於是花宮梵宇錯落其

間架巖倚壑菲草披菅戴石齒齒跨澗潺潺竹戶自掃  
雲房不關開軒而紫翠羅列俯檻而螺髻迴環瀑垂簾  
而莫卷藤翳壁而難攀與人寰乎迴隔空高真所往還  
披圖考乘靈蹤歷歷杯渡結茅伏虎卓錫崖甯葛洪之  
丹峰存張果之石太白題詩而更名齊丘辭相而潛迹  
冠卿有避諂之堂知微有會仙之宅夫唯秀絕寰區靈  
鍾巖澤故高士遊而忘歸道侶棲而不釋也爰惟至人  
乘願現身棄王宮而弗居遺軒冕其如塵越滄海以來  
遊偉茲山之絕鄰就東巖而枯坐灑法雨於天垠龍湧  
泉而汲足山出玉而飯新惟弘誓之無邊乃隨方而應



化運慈航於迷津燃慧炬於長夜跡以幽而彌顯道以  
久而逾彰應感周乎塵刹利濟遍乎遐荒故令斯人懷  
馨佩潔肅慮滌腸逾山越海禮覲趨蹌升茲山者如登  
靈鷲履茲境者如造天閭也悲塵寰之局促類旦暮之  
蜉蝣日奔馳於物役嗟名羈而利囚感槐陰之徙國悟  
大壑之移舟曷不息機而頓轡兮望崦嵫以少休五臺  
峨嶠旣以遠兮蓬萊方壺渺不可求庶抽簪而投杖兮  
託茲山以遨遊

端溪硯石賦

潘子久客端州自秋徂春蓬門晝掩蠟屐生塵有客過  
訪寂若無人披帷何有硯石錯陳疊架磊砢堆牀輪囷  
主人方盤礴其間窮日達晨摩挲品題樂以忘貧客顧  
而笑曰是奚爲者也嶺表珍奇是不一類珊瑚琥珀明  
珠文貝沈檀通犀象齒翡翠却塵之紈辟雨之毳子曾  
不是求而馳情於片石甚無謂也且是塊然者非有色  
聲香味之可娛購之兼金載之專車贈遺不名珍寶藏  
弄不如圖書兩手三硯爲已多而纍纍者將焉用是無  
乃近於愚乎主人听然而笑曰客但未知石之美耳誠

知將嗜之不已而奚暇笑余客曰嘗試言之主人曰二  
氣之英五材之精在地爲石在天爲星石之爲質頑然  
麤醜迨其神奇萬象無偶所以怪石作貢文石呈祥甲  
乙品於衛公袍笏拜於元章要其程功而致用無若硯  
石之最良武夫寶劔文人寶硯晦明與居寒暑無間淬  
筆鋒之鋸鉞發墨華之葱蒨貴利用而不窮故宜取於  
盡善硯材上品厥維端溪萬里滄江一峽束之秀氣廻  
薄靈液潛滋是生石寶美勝懸黎爾其巖分三層下層  
在水石岐三洞中洞最美造化所秘邃古莫啓誰鑿鴻  
蒙創割端紫唐斷其膚宋入肌理轉鑿轉浚今得其髓

三冬水落良匠是謀傳瓢涸水燃膏燭幽斧之登登削  
麤剝浮菁華乃出如琳如瑇其質則膩若搗粉縝若削  
絲潤若含凍柔若凝脂其色則淵然而光冲然而翠望  
之有形撫之無迹南離炳暉蒸爲紫雲馬肝純色火瘖  
間紋芙蓉出水以照灼初陽升天以鮮新美人薄醉而  
酡顏天孫七襄而錦文水月清華疑爲蕉白平鋪絞綃  
橫截崑瑩雲霏霏其綠林河耿耿以湛碧削春葱之始  
萌雪秋藕之乍擘青花最貴隱起石膚乍沈乍浮如有  
如無雁行過於遙天魚兒戲於清渠綺縠之理蹙香蘋  
藻之影扶疎惟人至靈乃有雙瞳石亦有眼巧出天工黑

三才圖會卷之十一  
三  
晴朗朗碧暈重重如珠剖蚌如月麗空紅爲丹砂黃爲  
象牙圓者鵝鴒長者爲鴉或孤標而雙映或三五而橫  
斜象台斗而可貴惟明潤而最佳至若點號翡翠輪名  
金錢玉帶橫亘黃龍斜纏鸞鳩之斑璠血之邊各約采  
以發色咸爭奇而鬪妍天質美矣復貴裁制迫之琢之  
乃成佳器爾乃選良工考舊譜量厚薄程細鉅審背面  
定顏武留精純去苦窳因圓成規週方爲矩妙隨材而  
適用任師心而法古爰有唐模宋範貢式藏型端方是  
尚樸雅爲經間標新而樹異有象物以賦形或構肩而  
壺腹或璧沼而珠庭或瓢身而瓦脊或鳳味而鶴翎風

田之文惟肖琴笏之德可銘於是鍊以散粟之砂砥以切玉之石文以瑩而逾明理以細而彌澤溫潤之色可餐鮮秀之采欲滴口噓呵而生津手捧握而成液其受墨也差差鱗鱗融洽停勻石與墨得墨與石親沛然膏流沛然耐醇磨之無聲浣之無痕其宜筆也沾濡不留運轉無滯墨飽固恬墨渴亦利中山柔毫迅掃不做使心忘手使手忘器故當妾視龍尾媵蓄金星澄泥斂色雀瓦銷聲彼洮河與鼉磯迴莫敢與抗衡者也夫其盛夏不燥隆冬不凍君子之節也溼不藏淄滌不留垢幽人之潔也廉芒內含溫文外著貞臣之烈也瑕不掩瑜

質不亂真介士之別也端凝靜默有勵俗之守焉厚重  
不毀有閱世之壽焉無色之色是爲真色無味之味是  
爲至味吾是以中心好之拊之抱之浴之澡之心賞神  
怡而不可以告客者也今夫珠璣象犀珍怪難得之物  
美則美矣固權門豪家之所宜蓄而於我乎何有其求  
之也傷廉其藏之也招咎豈若山川之美文翰之需廣  
坐可以共賞一室可以自娛石戶之封可守石田之獲  
不虛傳子孫而無累貽友朋而欣愉且人之歸自斯土  
者莫不運載兼乘轟隱道塗而吾舟小於葉身輕於鳧  
唯此磳磳與吾爲徒連箱累篋負挈以趨猶足詫奇珍

于鄉里而歷風濤于江湖也  
主人遊娑娑視林不知日之

暮  
乃愒悅自失逡巡而去



平山堂賦

伊茲堂之締構洵宏敞而寡儔超埃壒而屹起控名都  
之上遊崇臺塊其造天兮華棖鬱乎雲浮窮地勢於南  
條兮見江山之相繆苞牽牛而絡婺女兮納埃風乎不  
周惻恫怳於虛無兮眇仙靈之所畱爾其託體則平岡  
陂陁西走滁濠支阜崛起削成增高其面勢則宅岡之  
陽居乾之位觀宇迴環林薄周被爾乃斬懸巖以累砌  
規廣阿以築堂旁羅桂楹仰承杏梁飛宇周閣鱗鱗將  
將觚稜枌詣若迴若翔塗丹錯碧反景流光遠而望之  
龍窅參差若神山之出海見銀闕也仰而闕之碣磬巍

峩若射的之在空植箭栝也容兮如幄翠兮如冠霧翕  
雲舒不可乎得原若乃踐平臯經長坂步廣除臨絕巘  
瀏覽有無燭察近遠前瞻揚土之廣博兮原隰紛其錯  
重綬麗譙於連星兮壯千雉之金墉天斬剗夫神臯兮  
屬赴海之白虹層山迴顧乎秣陵兮藹三茅之仙峰左  
眺海陵原田每每熬波漉鹽利盡東海右瞰揚子銅陵  
嶕嶢卽山鑄冶吳淠以饒後巨浸之湯湯兮沐日月於  
中央洩斗門於邗溝兮轉舳艫於帝鄉泛歷覽其無垠  
兮蹇躊躇以相羊至如朝光綉野暝色騰麓晴景澄鮮  
激陰霖霖變合一瞬態窮萬族長楊垂絲大堤水平英

藁含華的鏤芬馨怒濤滄潏於曲江兮飛雪颯灑於燕  
城物無隱之能遞狀無奇而不呈耳目爲之滌蕩天日  
爲之開明斯誠臺觀之巨麗海表莫之與京者也於是  
邦伯郡牧來遊來豫珥節停騶怡情遣慮賓從詳雅尊  
俎有序究觀夫風土之清嘉與民物之阜庶山川之形  
便謠俗之遷注調燥濕於徽弦齊六轡之柔馭遙興遠  
思超乎獨喻其或賢人君子善辭能文比材曹劉方藻  
卿雲期春秋之佳日爰整駕而索羣參萬象於靈府吐  
玄黃之繽紛亦有都人士女嬉春競往稅青驪泊蘭棹  
采蘋蕪寒宿莽聯關河結遐想極泛濫沛自廣至如遷

人放客經奇瓌材鬱風雲乎未感臨岐路而徘徊塊獨  
遺此羈愁兮憑高望遠穆乎登臺悵民生之多故羨天  
地之無涯歲月忽如其流羗長吟而永懷原夫揚之爲  
土也襟背江淮縮轂水陸百貨所奏土膏衍沃故漢代  
疏以爲國隋帝巡而作宮唐藩宋闕承侈席豐經營窮  
乎地軸雕斲極夫天工璇璣瓊館穆若神居者蓋不知  
其幾而今皆影滅光沉山移壑徙際天驚沙覆地白葦  
螢飛秀麥之園鬼穴枯桑之岫惟斯堂也創自隆宋著  
於歐陽遺澤在人勿翦樹棠五百年乃有賢牧爰企德  
而希光考圖索乎故址新夏屋於崇岡華不侈心儉不

陋日高不絕陵澁不蔽谷不勞民而就不糜財而足形  
勢盡東南之美風聲表士庶之愛續前薪於無窮立可  
久而可大嗟宇宙之悠遐兮惟令聞爲不刊德業若大  
車之載兮文采輪轂而使前或鐫功於銅柱兮或沈碑  
於浚淵金石弊而名存兮孰膠結之使然慨賢豪之寥  
廓兮曠千載其猶比肩承休風而結撰兮尚有述於後  
賢

滄浪亭賦

伊吳城之雄闊苞萬井與千街市塵翼其鱗次官閣煥  
乎雲排惟南城爲空曠有水木之清佳山浮青而當戶  
水瀉白以縈堦廓平疇之百頃忽心舒而目開推蠶塵  
而頓遠延秀爽以乍來爰有巍亭冠乎高阜仰披烟霄  
旁帶林藪繡野襟前曲池環後豁達軒堂疏通戶牖萬  
象森其畢呈諸奇萃而咸剖茲惟滄浪之亭勝獨超而  
無耦在昔子美爲宋名賢負匡時之材略思補袞而濟  
川遭排擠於羣枉鬱忠貞而不宣厭洛下之喧雜樂吳  
風之清妍遠移家而卜築聊逍遙以窮年悅此奧區有

竹有水草樹豐茸川原演迤密邇宮堦隔絕巷市不山  
而靜寂非谷而宛委乃購隙地乃營亭臺扁舟草屨容  
與徘徊魚鳥相狎麋鹿爲儕忘窮達而遺毀譽信賢達  
之高懷茲其所以誇耀於國記稱述於歐梅也五百年  
來陵遷谷變兔走荒阡蛇遊枯澗燈青報賽之祠鐘冷  
伽陀之院蘗草沒而苔封剩遺踪其如縷倚歟宋公名  
世宗臣柱石龍鸞萃於一身撫東南之重地照寒谷於  
陽春民無隱而不恤俗無遠而弗詢旣政通而人和時  
求舊以訪古表前修之墜言存哲士之遺矩陟層岡而  
賞心想高賢其如覩思濯纓於清流眷嘉名之足取爰

作新亭廊是舊墟因高疊石就下浚渠依窪隆之曲折  
映竹樹之扶疎闢華堂於木末啟別館於巖隅雜植桐  
柳羅生芙蓉安翔野鳥泳躍儵魚縱物情之暢遂來天  
籟之虛徐想濠濮其不遠與習池而何殊公乃於機務  
餘閒來遊來眺集賓朋使授簡援琴觴而寄傲理東山  
之雅詠發南樓之清嘯政以暇而彌精思以幽而逾妙  
齊羊杜之高蹤同白蘇之逸調抑且橋矯不施藩籬不  
設公諸士民餐芳沐潔懷賢者薦夫頌蔡訪古者誦夫  
碑碣牛鐸得應黃鐘巴歌許賡白雪固將使昔賢高致  
標映江山而文采風流照耀不絕也載稽吳會風富園



池若辟疆之蟠松怪石任晦之曲沼層波南園之峰巒  
巧麗東墅之卉木珍奇是皆豪家之所締構貴帥之所  
指麾旣已灰飛烟滅光影無遺卽茲亭之墟主亦屢易  
經始於王孫落成於貴戚章相得之而增華韓王有之  
而加闢然無有舉其姓名尋其踪跡者惟子美也官不  
過長史身不在巖廊爲羈窮之遷客暫僑寓於江鄉徒  
以英風豪氣磊落軒昂直聲振於朝列翰藻播於遐荒  
遇雖窮而名顯身雖困而道光故令人撫遺墟而增感  
考陳蹟而表揚豈非豪華聲利如過隙而文章氣節爲  
久長也哉江湖散人尊鱸逸民去金門其已遠與泉石

而相親企先賢之逸敢歎當年之數屯忽光顯於此日  
類蠖屈而龍伸曠百世而相契信知己之有真感高誼  
之難覩聊寫心於斯文

福泉頌 有序

遵化州西北四十里有福泉山焉巖嶂摩霄層峰冠  
日林巒茂密洞壑環迴丹梯萬仞以削成素瀑千尋  
而飛注霞標霧卷鬱鬱芊芊信都畿之奧區游鷗之  
勝地若乃雄扼關城密護陵寢榮光之所繚屬王氣  
之所結蟠地脉敦龐川原靈秀是以草敷瑞莢林挺  
珍條陽崖興觸石之雲陰嶺積凝霜之乳神魚泳澗  
靈鳥翔阿我

皇上至孝篤誠永懷孺慕秋霜春露每凝想於園陵攀  
栢依松恒躬親乎展覲陟降之次周覽陵臯以茲山

森爽非常時垂

駐蹕山麓故有福泉寺寺前有泉一泓自地溢湧灼如  
蒸焰煖若燔湯百沸上騰雙池環浸俯窺則色若頗  
黎攬勺則味甘醴雲漿不能喻其潔爾露無以比  
其芳不周之溫原殆無以過銀山之暖漚曾何足云  
皇上祇奉

宮闈恪崇

任姒問安視膳無間於三朝禋福祝釐有加於羣衆以  
太皇太后春秋既尊第祿方盛引年却疾致孝莫先者  
諸圖記咸云湯泉能除百病又云浴者令人多壽

事推理信而有徵爰命疏泉斲池綠垣築室用備  
宮車臨幸之所蓋將川天之符藉神之貺延景福於難  
老申孝養而無方者也然而室無雕文地不營廓引  
流激水鮮魚龍鳧雁之奇壘檻架楹無琳琅金碧之  
飾斯又

聖主盛心翼翼兢兢愛一夫之力惜十家之產斲雕爲  
樸存素去華雖夏禹克儉周文甲服何以尚茲臣屬  
叨扈從奉詔來觀濯清漱芳逍遙永日偉天澤之旁  
流欽

皇猷之泮渙退而繹思謹獻頌曰

皇清受命覃制萬方威傾月窟德浸扶桑紫濛入貢窮  
髮來王際天罄地歸我阪章其龍門蘭峪無終之士昔  
惟邊匪今也庭戶陵宮言言考卜其所比洛鄜邠方秦

漸社其我

皇純孝通明洞幽祇奉陵寢展省歲周仰瞻弓劔俯睇

松楸靡高不卽靡浚不求其蔥龍崇山逶迤溪谷環迴

陵原如拱如伏碧樹芊眠彤雲陸縹爰有神泉騰湧其

麓其靈砂內沸陰火潛然蒸爲煖濡奮迅迴旋輪衛轂

轉雪瑩珠圓色澄空碧氣馥蘭荃其陰陽陶甄剛柔摩

蕩幽讚神功疇能測量溫谷湯山暄波灼浪昔聞其名

今燭厥狀

六其

祥以類感符以兆形地不愛寶神泉乃零

蠲疴起瘵益壽扶齡瓊膏甘露孰之與京

七其

翠華來巡

爰滌爰盥浴德澡躬滋之永嘆祇念

文母禕衣有戀思挹靈漿上綿慈算

八其

乃濟洪源方池

泱泱乃甃珉石疏溫納涼引之不竭挹之無方千齡永

御壽豈樂康

九其

自昔湯泉恒聞臨幸驪阜華清宮觀斯

盛雅咏鏗鈞奎章輝炳以古況今何足爲竝

十其

景從千

官星馳六飛何如我

皇致孝

宮闈雕欄繡柱璧砌璇題何如我

皇崇儉作規

其一

惟孝格天惟儉凝德光於四海萬邦

作則神運無名聖功不息敬天之休於萬斯億

其二